

Tlhopho-Bocha – Maqhetsoana a Tlhaloso

Ka selemo sa 2014 Sechaba sa Basotho se bile ntsoe-leng ka mafapha a fapakaneng a Boetapele ba sona lipolitiking le mekhahlelong e meng, hore ho hlokahala Tlhopho-Bocha ea tsamaiso ea litaba tsa Naha, e le ho hlobolisa ba matleng a Puso menyetla ea ho sebelisa lits'iea tsa Bosebeletsi ba Sechaba molemong oa boikhabi le litakatso tsa maquloana, le ho saretsa ba sa khemeng le bona. Pampits'ana ena e lokolisa ka bokhuts'oanyane leeto la Tlhopho-Bocha ho fihlela mona, sepheo sa eona, lits'iea tsa eona ka ba khathang tema, libopeho tsa lithala tsa Sechaba tsa ho kenya letsoho, le hore na kotulo ea mapomelo ea ts'ebetso ena e tla ba efe, 'me e tla sebelisoa joang.

Tlhopho-Bocha e Reretsoe ho Fihlala Eng?

1. Litsi tsa Bosebeletsi ba Sechaba tse nang le boikemelo, tse hloahloa, tse sehlahlo, 'me tse ikobelang likano tsa bosebeletsi bo hloekileng.
2. Lesotho le renang khotso, botsitso, le polokeho; moo bohle ba ikokobetsang tlas'a molao.
3. Molao oa Motheo oo e tla ba sets'abelo le thebe ea litokelo tsohle tsa likarolo kaofela tsa Sechaba.
4. Paballo ea tokelo ea bohle ho fumana toka makhotleng ntle le ts'usumetso ea ba nang le matla, haholo Babusi; ho sa tsotellehe libopeho, litumelo le lits'ekamelo tsa batho.
5. Phapanyetsano ea maikutlo le bophatlalatsi ba litaba tsa Sechaba ka tlhompheho, ntle le bohlohleletsi ba mahloeo khahlanong le maikutlo, litumelo kapa lits'ekamelo tsa mang kapa mang.
6. Puso e nang le boikarabello, e itlhalosang kapel'a Sechaba mabapi le mesebetsi le liketso tsa eona, 'me e sekehelang tsebe lillo tsa Sechaba, le ho arabela litlhoko tsa sona.
7. Bohlanka ba Sechaba bo iteleletseng tlhompheho ho Sechaba, le kholiso ea Naha le paballo ea seriti sa eona.
8. Kabelano ea tsohle tseo tlhaho e li fileng Naha, le menyetla ea boipheliso, ka mokhoa o lekalekanang ho bohle.
9. Poelano ea moshoelella , moo bohle ba baballang le ho hlonepha lits'ia tsa bonngoe ba Sechaba.

Ba Khathang Tema Kahar'a Tlhopho-Bocha

1. 'Muso ke ona o tataisang le ho hokahanya mahlakore ohle , o fanang ka lihlomo tsa ts'ebetso , le ho fetisa melao ea ho ts'ehetsa le ho ts'ireletsa ts'ebetso.
2. Komiti ea Tlhophisetso ea Limmoka tsa Tlhopho-Bocha (NDPC) e bopiloe ka boemeli ba Bapolitiki ba pusong, bohanyetsi kahare le kantle ho Paremente, le mafapha a 10 a mang a Sechaba; 'me ke eona eo ka molao e memang le ho laola tsamaiso ea 'Moka oa Naha le Limmoka tsa Litereke tsa Tlhopho-Bocha, ho bokella maikutlo a Basotho hohle moo ba phelang teng kahar'a Naha.
3. 'Moka oa Boetapele ba Sechaba (National Leaders Forum) o bitsoa nako le nako ha ho hlokahala ho rarolla likhoqetsane ts'ebetsong eohle ea Tlhopho-Bocha, 'me o thehoa ka boemeli ba Lipolitiki, Marena, Likereke, Mekhatlo ea Sechaba, Basali, Paramente le mekhahlelo e meng.
4. 'Moka oa Naha oa Khohola-koqo (National Dialogue) o boptjoa ka boemeli ba mafapha ohle a Sechaba, ho tloha lipolitiking ho kenella boikopanyong ba Basotho hohle; 'me o hama lipuisanong tsa boromuoa ba likarolo tsohle tsa Sechaba lintlha-kholo tse tla qoqoa ke Naha eohle ka Tlhopho-Bocha le ho tlhotla Litumellano tsa Sechaba tsa mapomela maikutlong a tsoaloang le Limmoka tsa Litereke.
5. Limmoka tsa Litereke (District Dialogues) li bokella maikutlo a Basotho metseng hohle moo ba phelang teng, ka mokhoa o ts'oanang le oa 'Moka oa Naha, ka khoelehetso ea Marena le Makhotla a Puso ea Libaka.
6. Lekhotla la Mekhatlo e Ikemetseng (LCN) le tataisa likopano tsa Limmoka tsa Litereke ho bokella maikutlo a Sechaba metseng hohle kahar'a Naha.
7. Motataisi oa Mokatlo oa Kopanelo ea Nts'etsopele Afrika e Boroa(SADC) Lesotho o okamela likopano tsa 'Moka oa Naha oa Khohola-koqo le tsa 'Moka oa Boetapele ba Secaba
8. Mokhatlo oa Machaba a Kopaneng (UN) ka makalana a ona a fapaneng, o ts'ehetsa Tlhopho-Bocha ka lichelete le litsebi.

Limmoka tsa Litereke li tla Sebetsa Joang?

1. Li tla bitsoa ke Komiti ea Tlhophisetso ea Limmoka tsa Tlhopho-Bocha (NDPC), ho ts'ohla litaba tse ts'oanang le tse ts'ohliloeng le ho hlahella kopanong ea 'Moka oa Pele oa Naha oa Tlhopho-Bocha.
2. Li tla tsamaisoa ke Lekhotla la Mekhatlo e Ikemetseng (LCN), tlas'a bolisa ba NDPC.
3. Li buletsoe baahi bohle ba libaka le litikoloho tse hloaetsoeng ho ba haufinyane le bona, moo li tla ts'oareloa teng.
4. Khomehetso ea tsona e tla etsoa ke Marena le Makhotla a Puso ea Libaka, libakeng tse hloailoeng, tse tla aparela Naha eohle.
5. Bohle ba ka ratang ho lebella ts'ebetso ena ba tla lumelloa, ka lipallo tse tla rapalatsa ke NDPC.

‘Moka oa Bobeli oa Khohola-koqo oa Naha

1. Ho tla ba le ‘Moka oa Bobeli oa Naha oa Khohola-koqo ebile e le oa mapomela, kamor’a Limmoka tsa Litereke.
2. ‘Moka o tla ts’ohla maikutlo a Sechaba a bokelletsoeng ka ‘Moka oa Pele oa Naha, le Limmoka tsa Litereke.
3. ‘Moka o tla tlhotla ho tsena Liqeto tsa Sechaba (National Resolutions) ka phetoho ea melao ea Naha.
4. ‘Moka o tla khetha Sehlopha sa Ts’ebetso se tla tataisa le ho hokahanya ts’ebetso e tla lebisa phetolelong ea Liqeto tsa Sechaba ho ba Melao ea Naha.
5. Tlaleho ea mapomelo e phuthetseng Liqeto tsa Sechaba e tla nehelanoa ka nako e le nngoe ho Motataisi oa SADC, Mohlomphehi Tona-Khoolo, le Moetapele oa Bohanyetsi Paramenteng.

Qetello ea Tlhopho-Bocha e tla Ba Eng?

1. Lintlha tse tlhotliloeng ke 'Moka oa Bobeli oa Naha li tla fetoleloa melaong ka ts'ebeliso ea litsebi mafapheng ka ho fapana.
2. Ho tla thehoa sehlopha sa batho se tla lisa ts'ebetso ena ka ho hloaea litsebi, ho sua liqeto tsa Sechaba, ka taao ea meralo ea ts'ebetso e hlakileng.
3. Litholoana tsa ts'ebetso ena li tla romelloa ho Lekhotla la Matona / 'Muso hore li fetoleloe ho ba litsoants'o tsa melao ka lihlooho tsa Makala (Matona) ao litaba tse joalo li oelang ho ona.
4. Lits'oants'o tse joalo tsa melao li tla fetisetsoa ho Paramente, 'me eona e tla li sebetsa ka mekhoa le litloaelo tsa eona, ho kenyeletsoa le ho mema maikutlo a mekhahlelo eohle ea Sechaba ka mecha eohle e ka khonehang; ho fihlela li fetoha melao.